

CUSSEGL GROND

Sessiun da favrer 2023

Dumonda da la fracziun da la PPS concernent la criminalitad liada a l'acquisiziun da drogas en la regiun da Cuira (emprima sutsegnadra Adank)

La Statistica criminala da la polizia (SCP) dal chantun Grischun da l'onn 2021 mussa, ch'ils delicts en il sector da la Lescha da narcotics vegnan commess – guardà tenor regiuns – particularmain en la regiun da Cuira e conturns e ch'il dumber da quests delicts è s'augmentà fermamain. Sch'ins cumpareglia la frequenza, vegn commess a Cuira – guardà sur l'entir chantun – il dumber il pli grond da delicts cunter la Lescha da narcotics.

Areguard las gruppas da vegliadetgna èn remartgabels ils suandants puncts:

- Particularmain persunas minorennas e persunas giuvnas creschidas (da 18 fin 24 onns) vegnan involvids pli e pli fitg en la criminalitad liada a l'acquisiziun da drogas.
- 13,4 pertschient dals delicts vegnan commess da persunas minorennas.
- Il possess respectivamain la sequestraziun en connex cun il consum da substanzas illegalas è per gronda part in delict da repetiziun registrà.
- Il dumber da delicts pli pitschens registrads (enguladitschs, infracziuns en vehichels e.u.v.) è sa dublegià mintga onn.
- Betg stimabel n'è il dumber zuppà.

Sch'ins cumpareglia l'onn 2020 cun l'onn 2021 èn er il commerzi, la cultivaziun u la produenziun illegala da narcotics daventads bler pli frequents (19 pertschient dapli delicts, 25 pertschient dapli crims). Las substanzas sequestradas èn principalmain marihuana, cocain, haschisch e heroin. Tras l'augment dal commerzi cun drogas da freebase resultan ultra da quai dependenzas pli dramaticas. Las consequenzas fisicas e psichicas èn anc pli grondas ed ils donns consecutivs a lunga vista èn gravants.

A Cuira chaschuna particularmain la repartiziun da las cumpetenzas tranter la Polizia da la citad da Cuira e la Polizia chantunala ina gronda sfida. Mo la Polizia chantunala dastga arrestar persunas che han commess in delict cunter la Lescha da narcotics (determinà sin basa da la regulaziun da cumpetenzas da la polizia giudiziala).

Cun gronda preoccupaziun observain nus quest svilup, cunzunt perquai ch'il dumber da cas s'augmenta cumprovadamain fitg e perquai che la segirezza da la populaziun ed en spezial da nossa giuventetgna patescha da questa situaziun. Cunquai ch'il commerzi illegal s'augmenta d'in cuntin, vegnan ils lieus da commerzi cun drogas a Cuira pli e pli er transferids en ils quartiers ed en las regiuns perifericas da la citad. In motiv per quai è er quel, che l'effect da las drogas tschessa bler pli svelt.

Las sutsegnadras ed ils sutsegnaders tschentan en quest connex las suandantas dumondas a la Regenza:

1. Co stima la Regenza la situaziun actuala ed il svilup da la criminalitad liada a l'acquisiziun da drogas e dal consum illegal da narcotics a Cuira?
2. Tge mesiras ponderescha il chantun da prender per limitar l'augment permanent dal dumber da delicts en connex cun il commerzi illegal, la cultivaziun u la produenziun illegala da drogas?
3. Co po la Regenza optimar ils puncts da contact e la repartiziun da las cumpetenzas tranter la Polizia da la citad e la Polizia chantunala, per ch'ils process d'arrestaziun e da scleriment possian vegnir accelerads e simplifitgads?
4. Actualmain vegn elavurà in concept chantunal per locals da dependenza. Tge mesiras supplementaras ponderescha il chantun da prender per sustegnair e per promover en moda pli activa ils programs da guariziun e d'accompagnament, e resguarda il nov concept per locals da dependenza las midadas da cumportament che resultan en connex cun il consum da drogas da freebase?

Cuira, ils 15 da favrer 2023

Adank, Brandenburger, Butzerin, Candrian, Casutt, Cortesi, Della Cà, Dürler, Favre Accola, Gort, Grass, Heim, Hug, Koch, Krättli, Menghini-Inauen, Morf, Rauch, Roffler, Salis, Sgier, Städler, Stocker, Weber